

Warm-Up Party Heimbärg

Am Afang gad churz e Rückblick: S' letschte Mou wo d Gaugesumpfer z Heimbärg si gsi, si mer chli is chaute Wasser gschosse wordä. Üsä Tambi het üs nach em erstä Uftritt us familiäre Gründ müässä verlooh. Den hei aui chli bibärät. Aber üsä Vizätambi, d'Stee, het das supär gmacht. Drum het d'Lies diä Saison chönnä beruhigt si, da si gwüsst het, dasses funktioniärt. Si het drum ni chönnä mitcho... ☹

Unger Druck si bi üs geng diäjenigä wo d Uftrittsitä löslä. Das Mou ischs de Böffi gsi. Sis Lächlä nachdäm er d Zitä zogä het, het di meistä chli verwirrt. Und siehe da, wer hetis anders dänkt: Es si di zwöi spätistä Uftrittä. Aber mir si üs das jo gwahnet. Gnuä Zit hei mir derfür gha üs mit dr Seline u em Särli z ungerhaltä, wo vili scho lang nüm gseh hei. Verpflegt hei mir üs o. O we d Chuchi ihrä Ablouf z ersch het müässä fingä, si mir zu üsäm Ässä cho. Es pari hei ihres Glück no bir Tombola usprobiärt. Es het chlini Erfougä gä wiä z. B. es Dush mit emne Tüächli u o grossi wiä dr Erotikkaländer. Dä Kaländer isch aber vomnä Gaugesumpfer (widär) anä Gschirrschärbeler verchouft wordä. Irgendwiä ischs emu 01:20 Uhr wordä u mir hei üsä zwöit Uftritt vor däm Publikum wo no isch dert gsi gha. Dä Uftritt isch speziell gsi. Bir Session isch plötzli nüm klar gsi wiä dr Ablouf isch, obwohl si sit mindestens föif Johr dr glich Ablouf het. Guät o Freestyle geit ☺. Aber o das hei mir zämä gschaft u si froh gsi, dass dr Uftritt guät acho isch. Usnahmswis si mir üs (widär) mou einig gsi, dass mir nachem letschtä Uftritt d Instrumänt ilädä u üs ufä Heiwäg machä.

Churfassig: Mir hei zämä gha, es isch e guäti Stimmig gsi u s wichtigstä mir hei Spass gha. ☺

By Tanja Jordi